

Poli'a Timoti Anante (2)

Avonkremin'nea Naneke

Musenke

1 ¹Nagra Poli'na, Kraisi Jisasi aposol ne'mo'na Anumzamo Agra avesite huhamprinanteno knare mni'zana Kraisi Jisasi huhamprine. ²Timotiga navesinegantoa mofavre nimoka, asuragiganteno asunku'zane arimpa fruzana Anumza nerfantegati ene Kraisi Jisasi Ranti'mo'a kza huno kamigahie.

Timoti musenke hunteno azeri hanaveti'nea naneke

³Nagra Anumzamofu muse hunentoe, nagehe'za hu'nazankna hu'na, erizama'a knare nagu nagesareti kinagane nanterane hakare zupa nunamuma hufina kagrikura antahi negamue. ⁴Kavunu herfi'nana zanku nentahi'na mago kna kagesua nagesa nentahue. Anama hanugeno nagrira muse zamo'a avitegahie. ⁵Nagra antahi'noe kagra kagu'areti kmentintia nehane, kota'zana negageho Lois ene negrera Yunesi'ke znantentintia hunana kna huno kagripina kmentintia me'ne hu'na nentahue. ⁶E'izanku Anumzamofu musezama (gift) kagu'afima kami'neana hugre kru huo, nazama kavufgare nentogeno, kami'nea zanku hugagesa nehue. ⁷Na'ankure Anumzamo'a kore huno fraki Avamura ontami'ne. Hianagi hanave'ane, avesiene, avufga antermino kentahi avamu tmi'ne.

⁸Hu'negu Rantimofu naneke huama hu'zantera kagzegura osuo, nagrama Agri kinama hu'nogura kagazea osuo. Hagi nagrane tragotenka knazana knare musenkerera (gospel) Anumzamofu hanavefi erio.

⁹Kefo zantifinti tza huno tvareno ruotge kezampinti tagihu'ne. Mago knare eriza eri'nona zanteku anara osu'ne, hagi Agra agafa'a me'negu huno asunku'zanteti Kraisi Jisasi ofenka'ati tza hu'neazamo mevava nehie. ¹⁰Hianagi menia tzahu ne' Kraisi Jisasi eriana nehuno, fri'zana eri netreno, tasimu neramino ofri manivava mani'zana knare musenkeafi (gospel) eriana nehie. ¹¹Ananku huno Anumzamo'a huhamprinantenege'na ke'a huama nehuna, aposol eri'zana e'nerina,

vahera knare musenkea rempia hunezmue. ¹²Na'ankure e'ina nehua agafare natazana e'nerue. Hianagi nagazema hu'zamo'a nazeri otregahie. Na'ankure nagra izantero namentintima nehumofona antahi'na kena nehuna, eri'zama'a erinentoana, Agra antahineankino kva kri ante'nenkeno ana kna efore hugahie. ¹³Nagripinti knare nanekema azerinana kea azeri hanavetio, kmentinti hu'zampino, avesi'zana, e'i Krai Jisasimpi me'ne. ¹⁴Ruotge Avamu'ma tagu'afi maninemo kza nehanigenka, antahi kamino kami'nea kmentinti'a kegva huo.

¹⁵Kagra antahi'nane maka Esia kaziga mani'naza vahe'mo'za natre'za uvu evuma hu'nazana, ana agu'afina Figelusi ene Hemogenesi'ke natrena'e. ¹⁶Nagrama seni nofite kina nompima mani'nogeno, agazegu osuno nazama hu'nerera, Onesiforusi nagara Ra Anumzamo asuntgi anteno aza hanie. ¹⁷Hianagi Romu kumate emani'nenonagrikuvu anteno hakreno ne-eno eme nage forehu'ne. ¹⁸Onesiforusina anama hu'nerera, Kraisi'ma esnia zupa Ra Anumzamo asuntaginteno aza hanie. Hanki nama'a zupo agra nazama hiana, Efesasi kumatera kagra ke'nane.

Timoti hanavetino knazampi manisia naneke

2 ¹Timotiga navesinegantoa ne'nimoka, Krai Jisasimpi hagerfino asunkuma hunegantegu hunka hanavetinka manio. ²Kagra nentahinke'na maka vahe zamufi huzmasmino'a kema amage nentaza vahera huzamasmige'za, zamagra anazanke hu'za ruga'a vahera rempi huzamiho. ³Kagra nagrama enerua kna kataza enerinka, Krai Jisasi'na knare sondia vahe'agna huo. ⁴Kraisi sondia ne'mo'a mopafi mani'zampina uvazi evazia nosie. Na'ankure huhampri ante'no sondia eri'za ami'nea ne' azeri muse hugahie. ⁵Ana zanke huno mago ne'mo zokagopi taragino nevuno, kasege amage' ontesimo'a muse'zana kini fetorira e'origahie. ⁶Hanavetino hoza enerisia ne'mo hoza'afi fore hania ne'zana ese'zana erino negahie. ⁷Negasmua naneke antahi ani' huo, Ra Anumzamo ana kemofa agafa'a hunegasmina, hakare zana antahigahane.

⁸Jisas Kraisinku kagesa are'are huo, fripinti eteno oti'ne, Daviti negeho'e, knare musenke (gospol) huama nehue. ⁹Na'ankure nagra ana zanteku hu'na knazana eneri'na hazenke vahe kna hu'na kina nehue. Hu'neanagi Anumzamofa nanekemo'a kina osugahie. ¹⁰Na'ankure ana agafare maka vahe'mo'za knare hanazegu kna zampina mase'na oti'na nehue. Ana hanuge'za hamprima zamante'nea nagamo'za Krai Jisasi'a zamaresige'za manivava konariri msa'a (glori) erigahaze. ¹¹Ama'i tamage naneke, Jisasi'ene fri'nomota, agrane ksefa huta manigahune. ¹²Knazama hanavetita mani'neta tagrama erisunana, henka'a Agrane kini kva vahe tro huta manigahune. Agriku ontahi'none huta tagrama hanunkeno'a, tagrikura ontamage'noe huno Agra nena hugahie. ¹³Tagra tamentintia nosunanagi, Agra ke'a ruotagregahie, na'ankure Agra havigea osugahie.

Havi naneke hunezmasmiza vahe zamazeri fatgo hania naneke

¹⁴Maka vahera huzmagesa huge'za ama ana nanekea antahiho. Kazigazi hunka Anumzamofu avufina zamazeri atru nehuge'za, ana nanekegura ke hakare osu'za fra ovaziho. Fra nevazisage'za antahisaza vahe'mokizmia zamazeri havia hugahie. ¹⁵Eri'zanka'a kazigzi hunka e'nerigeno, Anumzamofu negageno erizanka'agu muse hunegantena, kagazegura osugahane. Ana nehinkenka tamage naneke'a hufatgo hunka huama hugahane.

¹⁶Hianagi avufa'a omne mopafi zante hantaka hantoko naneke hanafina manigno, na'ankure ana zamo'a zamaza osnige'za havi anumzamofu avu'ava hugahaze. ¹⁷Ana naneke zamimo'a zamufgafi (gengrin, kensa), fugo namumo tera huno via kna nehie. Ana nanekema nehaza vahe'pina, tare netre mokizni znagi'a Himenasi'ene Filetusike, ¹⁸tamage naneke atre'ne hzagrena'a netremoke fri'zantipinti oti'zana hago fore hu'ne nehune, mago'a zamentintine vahera zamarimpa kna erinezmi'e. ¹⁹Ana hu'neanagi Anumzamofu nanekemo avempa huno arafuna reno me'ne, azanko avo (seal) me'negeno amanage huno kre'ne, Ra Anumzamofu nagare hu'za mani'naza vahera zamantahino keno hu'ne. Maka agi hanta nevaziza Ra Anumzane nehaza vahe'mo'za kefo mani'zampina maniagetagi'za maniho.

²⁰Menia mago ra nompina kolire ene silivareke tro hu'naza tinkvogera omne'ne, hagi mago'a zafare ene mopare trohu'naza tinkvone me'ne, mago'a kavomo'a ra agi amigahie. Hanki mago'a kavomo'a, ra agi'a omigahie.

²¹Hu'negu, mago'mo ana kefo zampinti agu'a sese hanimo'a, ra agi ami' tintafe kna hugahie. Zamazeri otage hanige'za, ozafa zamimofu eri'zampina knare hu'za eriga nehu'za, maka knare eri'zama erisagu zamu ante'za manigahaze. ²²Menia kahefa vahe'mo'za kefo avu'avazanku zamagesa nentahizankna osunka atrenka fro, fatgo zamofu nevaririnka, kmentinti nehunka, vaheku kvesinezmantenka fru hunka manio. Iza'o fatgo huno nemnino, Ra Anumzamofu agihanta nevzisia vahe'ene manio. ²³Hu'neanagi negi neno antahi'za omne vahe knara osuo, antahi sankeno'ma hafra huga hu'nesia kegura kamefi humio. ²⁴Ra Anumzamofu vahemo'za kefra ovazi snaze, hianagi vahera zamesi nezmante'za, rempi hunezmi'za, hazenke huzmante'saza vahe enena agzone hu'za maniho, ²⁵Fru huta fru kefinti ke hakare hurmantesamokizmia zamazeri fatgo hiho. E'ina hanageno ana ke ontahisaza vahera Anumzamofu zamaza hina, zamagu'a rukrahe nehu'za tamage kea antahi'za keza hugahaze. ²⁶Anahina zamagu'a ante fatgo nehu'za, Sata kifopima ahe'nazana katufegahaze. Sata'a kina huzmante'nege'za avesizama nevaririza zampintira atre'za vugahaze.

Mona Mopa vgaresia knafi fore hania kna'zamofu naneke

3 ¹Hianagi kagra Timotiga antahi ani' huo, mona mopa vgaresia knama upa'ma hanigeno'a, tusi'a knaza fore hugahie. ²Na'ankure

ana knama fore hanige'za, vahe'mo'za zamagraguke zamagesa nentahi'za, zgogu zamesinente'za, zamagra zamufga ra nehu'za, vahe zamage henkami netre'za, urinkege nehu'za, zamarera zamafa naneke erizafa osu'za, vahera muse kea huozmante'za, agru hu'za omnigahaze. ³Vaheku zamasunku osu'za, mago zamarimpa hu'za eri fatgo osu'za, vahe zamarimpa nere'za, vahe zamefiga'a ke nehu'za, manirva ohe'za, vahe zamata zamizanku'ke nehu'za, knare'zama hu'zankura zameosigahie. ⁴Komoru (betray) hunezmante'za, vaheku antahiozmi'za, osu'naza zante havige hu'za zmavufga ra nehu'za, mopafi mani'zante zamesinente'za, Anumzama avesi antega kana atregahaze. ⁵Zamagra Anumzamofomo avu'avara amega zamufareti nehu'za, zamagra tusi'a hanave Anumzamofompi me'neana zamefi hunemize. E'inama nehaza vahera nezmatrenka mani rure hunka manio. ⁶Na'ankure amu'no zamifina mago'a vahe'mo'za vahe nOMPI antagrige antagrige hu'za mreneri'za, zamagu'amo hanave otigeno kumipi kna zamisige'za mani'naza a'nemokizmi, kereti zamazeri havia hazage'za, naneke'zmi erizafa nehu'za zamavemanesia zante hakare'a havizana erifore nehaze. ⁷Mika'zupa ana a'nea rempi huzamige'za netahizanagi, tamage nanekea antahi ama nosaze. ⁸Janesi'ene Jambresikea korapara Mosesena ke ha'rentena'e, ana zanke hu'za rempi huzmi vahe'mo'za ke tamagemofona ha'renentaze. Antahintahi zamimo'a savri hige'za, zamentintimo'a haviza hu'ne. ⁹Hu'neanagi zamagra magore hu'za tagateoregahaze. Maka vahe'mo'za kesazana antahintahi'zamimo'a neginagi hu'naze. Janesi'ene Jambresike negi nena'a kna hugahaze.

¹⁰Timotiga rempi hunezmua kere nevaririne, nagri mani'zane, mago'za hunaku nagesa antahuane, namentinti huane, kfegefa osu'na ako nehena, navesi nezmante'na, knafi nemni'na anazanku osu kazigzi nehua zante nevaririne. ¹¹Nazanva ante'za nahe'zanasuza nehu'za, nataza nenami'za neganke'za Antioku kumate'ma hu'nazana, Ikonium kumate ene Listra kumate enema, nazanva hu'za nahe'za nasu'za nehzage'na kna zampina mse'na oti'na nehue. Ana hzanagi ana miko zampintira Ra Anumzamo nahokeheno nazeri natre'ne! ¹²Tamage, aza'o Krai Jisasimpi hagerfino Anumzamofomo avu'avate mani'naku hanimofona, vahe'mo'za knara zamante'za zamazeri haviza hugahaze. ¹³Hianagi havi vahe'mo'zane krunage nehza vahemo'zanena, haviza nehaza zampintira agtere'za tusi'a havizampi ufregahaze. Vahe'ma rezmatga nehza'zantera, ana zanke hu'za zamagri'enena rezmatga hugahaze. ¹⁴Ana hugahzanagi kagra, kazigzi hunka ko'ma rempima hunka antahinana kea azeri hanavetio. tagrama rempima hugami'nonazana kagra antahinka kenka hu'nane. ¹⁵Osi'moka otage avon tafepima me'nea nanekea antahime enka e'nane, e'i ana nanekemo knare kagukagesa negamina kmentinti nehunka, Krai Jisasipinti kahokeno kagu'vazizana erigahane. ¹⁶Anumzamo

huzamasmige'za maka ruotage avontafepi me'nea nanekea kre'nazankino, huzmi'sanana knare azahuzana me'neankino zamazeri fatgo nehuno, kazaki'zana eri fatgo nehuno, huzmeri hanige'za fatgo avu'ava hu'zankuke zamagesa antahigahaze. ¹⁷Na'ankure Anumzamofa vahe'mo'za atupa'ma hu'zankura ana nanekemo vite'zmante'nea, maka knare'za zamia erigahaze.

Poli'a Timotina antahi amino erizanke asmi'nea naneke

4 ¹Timotiga Anumzamofa avufine, Kraisi Jisasima kasefa huza mani'naza vahe'ene, fri' vahe'ene refko huzmantesia ne'mofa avufi, Agra'ama eama nehinkeno, Agri'a mona kumamo efore hania knagura, ²knare nanekea huzamasmio, kva hu'nenka kna'arero amne knarero, havi knarera zamazeri fatgo nehunka, hazenke hanazana, hanave kefinti zamazeri fatgo nehunka, kzone kefinti zamazeri fru nehunka, kavesra osunka kazigzi hunka knare naneke huama huo. ³Na'ankure mago knama enke'za vahe'mo'za knare kema antahizankura zamesra nehu'za, zamagra zamesiza nevariri'za zamesisia nanekema hanaza vahe zamage antegahaze. ⁴Tamage kea zamesra hunente'za agafa'a omne kere zamagu'a ante'za zamavririgahaze. ⁵Hu'neanagi kagra knare antahintahi e'nerinka, maka knaza fore hanifina katazana e'nerinka, kazigzi hunka Kraisintega vahera zamare anto, Anumzamo eri'zama kami'nea erizana erivgaro.

⁶Na'ankure nagrira hago kofta knafi, waini ti ofa hazankna hu'za korani'a eri tagi atregahaze. Nagrama vanua knani'mo'a hago atupa nehie. ⁷Nagra namentinti'a azeri hanavetina mani'nea, knare ha' hu'na nagiamana re'na e'noana hago ehnatue. ⁸Henka tagenoka hania zupa, fatgo avu'avazamofa kini fetori antani nantesiana antenante'ne. E'i Ra Anumzama fatgo huno naneke fgagohu ne'mo, ana knama ehnatisia zupa namigahie, nagrikera onmigahie. Hagi maka veama avesi nente'za eama hanigi Agri avegamanentaza nagamozane erigahaze.

Timotima, Polinte'ma esiazamofa naneke

⁹Nagrama mni'norega ame'hunka esnanegu nentahue. ¹⁰Na'ankure Demasi'a, ama mopafi zanku avenesigeno, nagrira natreno Tesalonaika kumate vu'ne. Kreseni'a Galesia kumate vigeno, Taitusi'a Dalmatia kumatega vu'ne. ¹¹Luku agrake nagranena mani'ne. Makina esnunka avrenka eno, nagri'ma naza hunoma eri'za erisigu egahie. ¹²Hianagi Tikikusina nagra huntogeno Efesasi kumatega vu'ne. ¹³Hanki Timotiga ne-enka anakre ku'nia Troas kumate Kapusi nompia atre'na e'noana e'nerinka, mago'a avontafe'ene, zgagfa akrute kre'naza avontafe ante'noane erinka eno. ¹⁴Alexandama kopama kreno tuzampaza tro nehia ne'mo'a, tusiza huno natazana nami'ne. Ra Anumzamo anazantera

nona'a hunteghahie. ¹⁵Kagra ana ne'kura kvagrio, na'ankure agra hanavetino huama nehuna kerera hara renerante. ¹⁶Hianagi ese'ma nanekefima otuge'za magomo'e huno navega osu'ne, natre'za vu'za e'za hu'naze, ana zankure huno Agra nona'a huozmantesie. ¹⁷Hianagi Ra Anumzamo onatreno nagrane mani'nenon hanave nami'ne, ana higeno nagrama nehua nanekemo'a ama hnige'za, maka zamufga tga osu vahe'mo'za antahigahaze. Ananku huno nagrira nahoke aheno laionimofo agipintira navzu hutre'ne. ¹⁸Ra Anumzamo maka havizampinti nahoke heno nenavreno, Agra nemnia kumate monafinka kva hunanteno navreno vugahie. Agra konariri nentake msa'afi nemnimofo agi'a maka zupa hentesga huvava hanune. Tmage.

¹⁹Prisilane Akuila kizniregane, Onesiforus nompi nemniza nagategane musenke vie. ²⁰Erastusi'a Korinti kumate manige'na, Trofimasi'a kri erige'na Maeletus kumate nagra atre'na e'noe. ²¹Kafegfa hunka zasi ikana ohnati'nesigenka eno. Ebulusi'a musenke atregante, anazanke huno Pudensi'ene, Linusi'ma, Klaudia'ma, maka tafuhe'zane, tsarahe'zane muse ke atregantaze. ²²Ra Anumzamo kagri avamu'ene manisie. Asunku'zamo'a kagrane mesie.